

Colosenses

**Pablo cātzo'knuni'lh xalanī'n
nac Colosas tī ixta'a'ka'i'**

1 Quit Pablo tī cāmacamini'yān huā'mā' carta ē quit ixapóstol Jesucristo chī ixtalacasqui'nīn Dios. Nā hui'lh huā'tzā' quintā'tinca'n Timoteo. ²Quinchā'tu'ca'n iccāmacā'ni'yāchā'n saludos milipō'ktuca'n xalanī'n nac Colosas tī tā'tapa'ksiyā'tit Dios ē jā taxtutāya'ni'ta'ntit na ixtej Cristo. QuinTāta'ca'n Dios cacālakalhu'mani' ē tzej calatapā'tit.

**Pablo orarlīni'lh Dios
ixpālacata tā'timin**

³A'cxni' icorarlīni'yāuj Dios tī ixTāta' Jesucristo quiMāpa'ksini', icorarliyāuj mimpālacataca'n. Pō'ktu quilhtamacuj icmaxqui'yāuj tapāxcatca'tzīn ⁴ixpālacata quincātamāca'tzīnīn chī a'ka'i'ni'yā'tit Jesucristo ē chī cāpāxqui'yā'tit ixlipō'ktuca'n ixtachi'xcuhui't Dios. ⁵Chuntza' a'ka'i'yā'tit ē cāpāxqui'yā'tit ixpālacata ka'lhīpā'na'ntit tū māqui'cani't mimpālacataca'n nac a'kapūn. Ū'tza' hui'xina'n sca'ttittza' a'cxni' pūla kexpa'ttit xatze tachihuīn tū ixlicāna'. ⁶Chuntza' chī

cātalimāsu'yuni'ni'ta'n hui'xina'n, calhāxcuhuālh nac cā'quilhtamacuj nā cāmāsu'yuni'mā'ca.

Talhūhua'mā'nalh tachi'xcuhui't tī ta'a'ka'i'mā'nalh. Nā chuntza' lanī't na milacpu'na'i'tātca'n a'cxni' kexpa'ttit ē ca'tzītīt chī Dios ixlicāna' quincālakalhu'manān. Hui'xina'n ca'tziyā'tit ixlicāna' tū cātamāsu'yuni'n. ⁷Ē chuntza' cāmāsu'yuni'n Epafra's tī quincātā'scujni' ē tī icpāxqui'yāuj. Xla' quilakxokoca'n quit ē Timoteo ē lilacatejtin scuja chuntza' chī i'scujni' Cristo.

⁸Quincātamāca'tzīnīn xla' chī lālīpāxqui'yā'tit ixpālacata Espiritu Santo.

⁹A'cxni' ickexmatui chī a'ka'i'tit, quina'n jā icmaxtekui icorarlīni'yāuj Dios mimpālacataca'n. Icsqui'ni'yāuj hui'xina'n tzej caca'tzītīt tū ixtalacasqui'nīn Dios. Chuntza' Dios tzej nacāmāca'tzīniyān tū xla' lacasqui'n natlahua'yā'tit. Cālimāsu'yuni'yān ixEspiritu ē tzē natlahua'yā'tit.

¹⁰Chuntza' naca'tziyā'tit chī nalilatā'kchokoyā'tit chī Dios lacasqui'n ē catūxcuhuālh tū natlahua'yā'tit namakapāxui Dios.

Xatze tū tlahua'yā'tit, ē ū'tza' lītasu'yu tlahua'pā'na'ntit ixtascujūt Dios. Ā'chulā' naca'tziyā'tit chī ixlīDios. ¹¹Cacālimātli'hui'clhīn xaka'tla' ixlīli'hui'qui Dios chuntza' chī xla' māstā' ē ū'tza' nalitāyani'yā'tit tū nacā'a'kspulayān ē jā nalījiclhua'yā'tit. Napāxuhua'yā'tit. ¹²Camaxquī'tit tapāxcatca'tzīn xaTāta' Dios. Xla' quincācāxtlahuanī'ta'n ē chuntza' tzē namaktini'nāuj tū cāxtlahuacani't expālacata a'ka'i'yāuj Dios. Ē ū'tza' huā'mā' jā Dios māpa'ksīni'nkō' ē a'ntza' pō'ktu quilhtamacuj xkaka. ¹³Dios quincāmakapūtāxtūn jā cā'pucsua' ē jā māpa'ksīni'n skāhuī'ni'. Quincālē'n jā māpa'ksīni'n ī'Ska'ta' tī laktza' pāxquī'. ¹⁴Jesús quincālakmāxtun ē quincāmātzā'nkēna'ni'kō'n quincuentaca'n.

**Dios ē tachi'xcuhui't tako'xamixli
expālacata Cristo**

¹⁵Masqui jāla laktzī'ncan Dios, Jesús māsu'yulh chī ixlīDios. Xla' Dios lacsacli namāpa'ksi ixlipō'ktu tū huī'lh. ¹⁶Cristo tlahualh ixlipō'ktu tū a'nan nac a'kapūn ē nac cā'ti'ya'tna' tū laktzī'ncan ē tū jāla laktzī'ncan. Cristo cāxtlahualh chī namāpa'ksīni'ncan nac a'kapūn ē cāhuī'lilh xanapuxcu'nu' ángeles. Nā cāmātzuculh tī cāmāpa'ksi espíritus. Tlahualh ixlipō'ktu tū a'nan expālacata nalimakapāxui xla'. ¹⁷Xla' xapūla ixuanī't ē jā ixlipō'ktu tū a'nan ē expālacata xla' ixlipō'ktucus huī'lh ē tzej lamā'lh. ¹⁸Ixlipō'ktuca'n tī ta'a'ka'i'ni' Jesús, xla'ca'n talitāxtunī't hua'chi

ixmacni'. Xla' hua'chi ixa'kxāk tzamā' macni'. Xla' xalitzucuni' ē xla' xapuxcu' ixlipō'ktuca'n tī natalacastālancuana'n. Chuntza' xla' xapūla ē nacāmāpa'ksikō' ixlipō'ktu. ¹⁹Chuntza' pō'ktu tū Dios ka'lhī, nā ka'lhī Cristo. Chī Dios, chu chuntza' Cristo. Chuntza' ixtalacasqui'nīn Dios. ²⁰Tako'xamixkō'lh Dios ē tachi'xcuhui't expālacata Jesús. Catīxcuahuālh nac cā'ti'ya'tna' ē catīxcuahuālh nac a'kapūn, ixlipō'ktuca'n ē Dios cāmāko'xamixikō'ca. Ū'tza tlahualh a'cxni' xtokohua'ca'ca Jesús ē taxtulh ixa'lhni'.

²¹Hui'xina'n ixtā'lāquiclhaktzi' Dios ixuanī'ta'ntit. Jā ixlaktzī'ncu'tunā'tit Dios ē jā ixca'tzīcu'tunā'tit tū xla' lacasqui'n. Hui'xina'n ixtlahua'yā'tit tū jā tze. ²²Chuhua'j ixamigos Dios hua'ni'ta'ntit expālacata Cristo cāmāko'xamixīn a'cxni' māstā'lh ixmacni' nanī. Chuntza' tlahualh expālacata tzē nacāmāsu'yukō'yān lactze na ixlacatīn Dios ē expālacata jā tū nalacli'pinā'tit ē jā na'a'nan tū nacātalīpuzāna'ni'yān. ²³Chuntza' ixlacasqui'nca na'a'ka'i'tēlhayā'tit ē jā cataxtutāya'tit na ixtej Dios. Jā calakpali'tit chī a'ka'i'yā'tit. Xatze tachihuīn tū cāmāsu'yuni'n huī'xina'n ē tū li'a'kchihuīna'nca calhāxcuahuālh nac cā'quilhtamacuj, ū'tza' ca'a'ka'i'tit. Huā'mā' xatze tachihuīn i'xla' Jesucristo ē ū'tza' tū quit icmāsu'yu.

**Pablo huanli Cristo
cātā'lahuī'lh tī ta'a'ka'i'**

²⁴Chuhua'j masqui icpātīni'mā'lh mimpālacataca'n, iclipāxuhua. Tū

pāti quimacni', ū'tza' maktāya namākentaxtūkō' tū ixlacasqui'nca napātini'ncan ixpālacata tī ta'a'ka'ī'. Quina'n hua'chi ixmacni' Jesucristo.

²⁵Ē quit chuntza' chī Dios quimacamaxqui'llh quintascujūt mimpālacataca'n, chuntza' icmāsu'yukō' ixtachihuīn Dios.

²⁶Huā'mā' tū iccāmātzē'kni'canī't tachi'xcuhui't hasta a'cxni' tzuculh cā'quilhtamacuj, ū'tza' chuhua'lj cāmāsu'yuni'can xlaca'n tī ta'a'ka'ī'.

²⁷Dios lacasqui'n xlaca'n nataka'tzi chī xaka'tla' ē tzēhuanī't ū'tza' tū ixtatzē'knī't. Ū'tza' huā'mā': Cristo lacxtim cātā'hui'la israelitas ē nā tī jā israelitas. Ū'tza' lika'lhīpā'na'ntit tū milaca'n nahuan nac a'kapūn.

²⁸Huā'mā' Cristo quina'n iccāmāsu'yuni'yāuj ixlipō'ktuca'n tachi'xcuhui't ē iccāhuaniyāuj tū nacā'a'kspula palh jā nata'a'ka'ī'. Iccāmālacapāstaqui'yāuj ixlipō'ktuca'n ē iccālīmāsu'yuni'yāuj talacapāstacni' tū Cristo quincāmāca'tzīnīn.

Chuntza' tzē na'iccāmaktāyayāuj natalitaxtu chī Cristo lacasqui'n.

²⁹Ū'tza' quit icliscujmā'lh.

Ixlipō'ktu quililiti'hui'qui tū xla' quimāhuixcāni, ū'tza' icliscuja.

2 Quit iclacasqui'n naca'tziyā'tit chī icscujmā'lh

mimpālacataca'n hui'xina'n xalanī'n nac Colosas ē nā xlaca'n xalanī'n nac Laodicea ē chī ixlipō'ktuca'n xalanī'n jā jā tī quilakapasa. ²Icscujmā'lh na'iccāmāhuixcāni ixlipō'ktuca'n ixpālacata chī talāpāxqui'. Iclacasqui'n natalāpāxqui' ē lacxtim natalitaxtu. Iclacasqui'n nataka'tzi tzej natakexmata xaxlicāna' ē

nataka'tzi tū xmān ixca'tzi Dios hasta chuhua'lj. Ū'tza' tū jā ixca'tzīcan ixpālacata Cristo. ³Jā maclacasqui'nāuj xtum tamāsu'yun. Xmān Cristo ca'tzikō' ixlipō'ktu ē tzē naquincāmāscā'tiyān ē tzē naquincāmākexmatiyān tū quincāmāsu'yuni'n. ⁴Ū'tza' huā'mā' iccāhuaniyān ē chuntza' jā tī chā'tin nacālī'a'kskāhuī'yān xatzēhuani't tachihuīn. ⁵Masqui jā cātā'hui'lacha' quimacni', quintalacapāstacni' cātā'hui'lacha'. Līpāxuhua iclaktzī'mā'lh chī tzej latā'kchokoyā'tit ē jā taxtutāyayā'tit na ixtej Dios. Ū'tza' iclīpāxuhua.

⁶A'ka'ī'ni'ni'ta'ntit Cristo hua'chi miMāpa'ksini'ca'n, nā chuntza' nalatā'kchokoyā'tit hua'chi hui'xina'n ē Cristo chu lacxtim. ⁷Tzej ca'a'ka'ī'ni'tit tū cātāmāsu'yuni'n. Ū'tza' hua'chi pūlactin qui'hui' tū pūlhmā'n mā'cnūlh ixtankēx'ēk. Ā'chulā' nalisca'ttēlhayā'tit chī māsuyulh Cristo ē natasuyu hua'chi stacpā'na'ntit chuntza' chī tasuyu stacmā'lh qui'hui'. Lhūhua' tapāxcatca'tzīn namaxqui'yā'tit ixpālacata Jesús.

Cristo quincāmāxqui'yān xasāsti' quilatamatca'n

⁸Cuenta catlahua'tit ē jā catamakxtektit ā'chā'tin nacālī'a'kskāhuī'yān tū māsuyu tū jā ixlicāna' ē jā tū ixtapalh. Huā'mā' tamāsu'yun nacāmāpātza'nkēniyān tū a'ka'ī'yā'tit. Xmān cāmāsu'yuni'yān ixtachihuīnca'n chī'xcuhui'n tī tahuan palh ixlacasqui'nca natlahua'yā'tit lhūhua' catūhuā'lh ē ū'tza' Dios

nacālilaktzī'nān lactze. Tahun palh xmān a'ka'i'ni'yā'tit Cristo, tisputus. Huā'mā' tamāsu'yun ixtapuhūanca'n chī'xcuhūi'n ē jā ixla' Cristo.

⁹Cuenta catlahua'tit jā cātitamāsu'yuni'yān tū jā ixlicāna' ixpālacata Cristo ē chī Cristo chu chā'tin chī Dios. ¹⁰Hui'xina'n tapa'ksini'yā'tit Cristo ē ū'tza' litzuma'yā'tit ixlītlī'hui'qui. Xla' ū'tza' xapuxcu' ixlīpō'ktu limāpa'ksin ē ixlīpō'ktuca'n tī tamāpa'ksini'n. ¹¹A'cxni' tamacamāstā'ni'tit Cristo, cātaxapani'n mincuentaca'n ē ū'tza' hui'xina'n xtumtza' cālīhūi'līn Dios. Chī'xcuhūi'n cāchu'cuni'can ixmacni'ca'n natatlahua circuncisión ē ū'tza' līca'tzīcan xtum cāhūi'līcan. Xtum chī Cristo quincāmāxtumli'yān. Hua'chi ū'tza' quincātalīchu'cumaka'ni'n quincuentaca'n ē quincāmāxqui'n xasāsti' quilīstacna'ca'n. Huā'mā' circuncisión jā ixla' quimacni'ca'n. ¹²Xasāsti' milatamatca'n chuhua'j ixpālacata a'ka'i'ni'yā'tit Dios. A'cxni' a'kpaxtit, ū'tza' limāsu'yulh hua'chi cātātā'mā'cnūyān Cristo ē tā'lacastālancuana'ntit ixpālacata Dios mālacastālancuanīlh Cristo. ¹³Hui'xina'n hua'chi xanīn ixuanī'ta'ntit ixpālacata mincuentaca'n ē jā tze chī ixlīlatlā'huanā'tit. A'cxni' Dios quincāmātzā'nkēna'ni'kō'n quincuentaca'n, xla' quincāmālacastālancuanīn chu lacxtim chī Cristo. ¹⁴Hua'chi ixtzo'kcani't a'ktin tatzō'knu' tū quincātalīmālacsu'yuyān. Dios mālaksputūkō'lh ē

cāmālakspūtūkō'lh ixlīpō'ktu tū ixlaclē'nāuj. Dios māpānūkō'lh a'cxni' xtokohua'ca'ca Cristo nac cruz ē hua'chi tā'xtokohua'ca'ca tatzō'knu' nac cruz. ¹⁵Ixlīpō'ktu ā'makapitzīn limāpa'ksin tū a'nān huā'tzā' nac cā'quilhtamacuj ē nac ū'ni', Dios cāmaktikō'lh ixlīmāpa'ksīnca'n ē cāmāmaxanī'lh cā'lhūhua'lacatīn. Dios cātīlajlh ixpālacata Cristo a'cxni' nilh nac cruz.

Caputzatit tū xala' nac a'kapūn

¹⁶Chuntza' jā catitamakxtektit ā'chā'tin nacā'a'ksa'nān ixpālacata tū hua'yā'tit ē nūn ixpālacata jā tlahua'yā'tit cuenta cā'tani' nūn sábadō. ¹⁷Tzamā' tamāsu'yun xmān hua'chi ixmāstilē'k chī Dios māpa'ksī. Cristo ū'tza' tī tlahualh huā'mā' māstilē'k ē xla' māsu'yu chī limāpa'ksini'n Dios. ¹⁸Jā catamakxtektit ā'chā'tin nacā'a'kskāhūi'yān a'cxni' nahuan jā minī'ni' chā'tin chī'xcu' na'orarlīni' Dios. Makapitzīn tahun ixlacasqui'nca pūla nacā'orarlīni' ángeles. Tī huan chuntza' lacasqui'n napuhua'nā'tit xla' jā ka'tla' makca'tzī masqui jā ixlicāna'. Ka'tla' limakca'tzī ixpālacata tū līlakachuyalh. Ixtapuhūān jā ixla' Espīritu Santo. ¹⁹Chuntza' tlahua ē jā tzej stālani' Cristo tī hua'chi ixa'kxāk macni'. Huā'mā' macni', ū'tza' tī ta'a'ka'i'. Quimacni'ca'n cāka'lhī ixtatā'stucut ē i'xno'jot tū limaktāya ē tū lālīchi'pani't. Quina'kxākca'n, ū'tza' tū māpa'ksī quimacni'ca'n. Chuntza' Cristo tī ixa'kxākca'n tī ta'a'ka'i' limāstaqui ixmacni' ixlīmāpa'ksin

Dios. Ixmacni' Cristo, ū'tza' xlaca'n tī ta'a'ka'i'. Ixmacni' Cristo a'ktin huanī't ixpālacata tī ta'a'ka'i' talipāhuan xla'.

²⁰Tī jā ta'a'ka'i'ni' Cristo tahuan ixlacasqui'nca nacālakachi'xcuhui'yā'tit lhūhua' tahui'lat tū jā ixla' Cristo. Hui'xina'n hua'chi tā'nī'tit Cristo ē chuntza' jā ixlacasqui'nca nacālakachi'xcuhui'yā'tit ixtahui'latca'n tachi'xcuhui't. ¿Tū ixpālacata tlahua'yā'tit tahui'lat chī tahuan? ²¹Huancan: “Jā tixa'ma'ya' huā'mā'. Jā tihua'ya' huā'mā'. Jā tichi'paya' huā'mā'.” ²²Ixlipō'ktu tū tzē chi'pacan o hua'can o xa'macan, jā catitatāyani'lh; pō'ktu natasputkō'. Tzamā' tahui'lat xmān tū tamāpa'ksi' chī'xcuhui'n ē tamāsu'yu xlaca'n. ²³Tī chuntza' tamāsu'yu, tapuhuan hua'chi tzej lacaca'tzī chī talaktaquilhpūta ángeles. Masqui tamakapātīni ixmacni'ca'n, xmān ā'chulā' ka'tla' natalimakca'tzī.

3 Hui'xina'n tā'lacastālancuana'ntit Cristo ē ka'lhī'yā'tit xasāsti' milatamatca'n, ē chuntza' calihui'li'tit naka'lhī'yā'tit tū nacālakpalini'yān ixpālacata nalitaxtuyā'tit chī Cristo. Xla' pāxtūtahui'lh Dios ē tā'māpa'ksini'mā'lh. ²Pō'ktu quilhtamacuj nalacapāstacā'tit tū ixla' Cristo ē jā catilī'a'ktuyunā'tit tū xala' nac cā'quilhtamacuj. ³Tzamā' ū'tza' jātza' la cātalimāpa'ksiyān ixpālacata milatamatca'n tatā'tzē'kni't Cristo. Dios ū'tza' tī cāmātzē'kli. Hua'chi nīnī'ta'ntittza' ē jātza' la māpa'ksican tī xanintza'. ⁴A'cxni'

namimpala Cristo ē naxkaka, nā hui'xina'n natā'tasu'yuyā'tit ixpālacata milatamatca'n chu lacxtim chī xla'.

**Pablo māsu'yulh chī
tatalakpalilh tī ixla' Cristo**

⁵Chuntza' calihui'li'tit nacāmāxtukō'yā'tit mintalacapāstacni'ca'n tū jā tze. Tū jā tze, ū'tza' huā'mā': ka'lhīcan ixtā'lāpāxqui'nca'n; ka'lhīcan jā tze talacapāstacni'; tamakxtekcan cāmāpa'ksi' ixmacni'ca'n; lakatīcan tū jā tze; ē tampi'lhīni'nca'n. Tī chuntza' tatlahua, ixtā'chuntza' tī tatzokostani' a'ktin ídolo.

⁶Līsītzī' Dios tzamā' tū jā tze. Namin a'ktin quilhtamacuj ē tī jā takexmatni' Dios xlaca'n nataca'tzī ixtasītzī' Dios. ⁷Nā hui'xina'n chuntza' ixlatlā'hua'nā'tit a'cxni' jāna'j ixa'ka'i'yā'tit. ⁸Chuhua'j cacāmāxtumli'tit ixlipō'ktu tzamā': tasītzī' ē tā'ksa'nīn. Jātza' catiquiclhaktzī'nī'ni'ntit. Tū jā tze tachihuīn jātza' catiquilhtaxtutit.

⁹Jā cati'a'kskāhui'tit ā'chā'tin. Makxtektittza' mintalacapāstacni'ca'n tū jā tze ¹⁰ē lakpali'tit mintalacapāstacni'ca'n. Xasāsti' sca'tpā'na'ntit ixpālacata ā'chulā' nalitaxtuyā'tit chī Dios tī cāmāxqui'n xasāsti' milatamatca'n. Chuntza' naca'tziyā'tit chī ixli'Dios. ¹¹Ixlipō'ktuca'n tī ta'a'ka'i' chu a'ktin tahuanī't. Griego tī a'ka'i' chu lacxtim chī israelita tī lakapasa ixlīmāpa'ksin Moisés ē tī a'ka'i'. Nā tī tlahuani'canī't circuncisión chu lacxtim chī tī jā tlahuani'canī't circuncisión. Tī xamini' ē tī jā tū ca'tzī ē xatastā'maka tasācuā' ē

tí xalaktaxtuni', ixlipō'ktuca'n a'ktin tahuani't ixpālacata Cristo. Xmān Cristo talipāhuan. Cristo quincātā'hui'lan quilipō'ktuca'n tí a'ka'lyāuj ē xmān xla' quincāmātlahuīyān chuntza' chī Dios lacasqui'n.

¹²Dios cālacsacni'ta'n hui'xina'n ē cāpāxqui'yān ē xtum cāhui'lin ixpālacata ixla' nalitaxtuyā'tit. Ū'tza' calihui'li'tit nalakalhu'ma'nā'tit ē nacāmaktāyayā'tit ā'makapitzīn. Jā ka'tla' catimakca'tzītīt ē jā palha' catisqui'ntit tū mimpālacataca'n. Pūla calacapāstactit ā'chā'tin. Jā palaj casitzi'tit. ¹³Catāyani'tit tū cātlahuani'yān tū jā tze ā'chā'tin ē calāmātza'nkēna'ni'tit tí puhua'nā'tit cāmaklaclē'nān. Calāmātza'nkēna'ni'tit lacxtim chī Cristo cāmātza'nkēna'ni'n. ¹⁴Tū ā'chulā' ixlacasqui'nca, ū'tza' huā'mā': talāpāxqui'n, ē ū'tza' hua'chi tū nacālimāchi'pikō' ixlipō'ktu mililactzeyca'n. ¹⁵Dios cacāmakapāxuihl milistacna'ca'n ē cacāmakapāxuihl ixlīstacna'ca'n ā'makapitzīn tí ta'a'ka'ī'. Ū'tza' chu a'ktin lihuanā'tit milipō'ktuca'n. Nā ū'tza' tū nacālimaktāyayān ē tzē naca'tziyā'tit tū tze ē tū jā tze. Chuntza' capāxuhua'tit ē camāstā'tit tapāxcatca'tzīn.

¹⁶Lhūhua' calacapāstactēlha'tit ixtachihuīn Cristo. Nalālimāsu'yuni'yā'tit ē nalālimaxqui'yā'tit talacapāstacni' ixlitli'hui'qui Dios. Cacālipixtli'tit ixlipō'ktu milistacna'ca'n salmos ē himnos ē cantos tū ixla' Dios. Camaxqui'tit tapāxcatca'tzīn Dios a'cxni' pixtli'yā'tit. ¹⁷Palh

nachihuī'na'nā'tit, palh napixtli'yā'tit, palh natlahua'yā'tit catūhuālh, catūxcuhuālh calalh tū tlhua'pā'na'ntit, calitlahua'tit ixlitli'hui'qui Māpa'ksini' Jesús. Camaxqui'tit tapāxcatca'tzīn Dios xaTāta' ixpālacata Jesús.

**Pablo huanli chī
natalatā'kchoko tí ta'a'ka'ī'**

¹⁸Puscan cacākexpa'tni'tit minkōlu'ca'n chī cāmini'ni' tí ta'a'ka'ī'. ¹⁹Chī'xcuhui'n cacāpāxqui'tit mimpuscātca'n ē līl catejtin catā'chihuīna'ntit. Jā calāquilhni'tit. ²⁰Lacstīn, pō'ktu quilhtamacuj cacākexpa'tni'tit mintāta'ca'n ē mintzi'ca'n ixpālacata chuntza' namakapāxui'yā'tit Dios. ²¹Xanatātana' jā ticāmakasitzi'yā'tit milacstīnca'n ē jā natamakchuya. ²²Xatastā'maka tasācua'n tzej cacākexpa'tni'tit tí cāmāpa'ksiyān. Jā xmān catisucjtit a'cxni' cātalaktzi'nān. Nalihui'li'yā'tit pō'ktu nascujā'tit ē chuntza' lakachi'xcuhui'yā'tit Māpa'ksini'. ²³Catūxcuhuālh calalh mintascujūtca'n, ū'tza' nalihui'li'yā'tit natlahua'kō'yā'tit hua'chi Māpa'ksini' Jesucristo mimpatronca'n ē jā chā'tin chī'xcu'. ²⁴Hui'xina'n ca'tziyā'tit Māpa'ksini' nacāmaxqui'yān mintatlajca'n xala' nac a'kapūn. Hui'xina'n i'scujnu'ni'n Māpa'ksini' Jesucristo. ²⁵Catīxcuhuālh natlahua tū jā tze, xla' naxoko. Ixlipō'ktuca'n tí tatlahua tū jā tze, ixlipō'ktuca'n lacxtim na ixlacatīn Dios.

4 Hui'xina'n tí xapatrón, cacāmaxqui'tit

mintasācua'ca'n tū cāminī'ni' ē tū xlaca'n tatlahajlh. Ca'tziyā'tit hui'lacha' nac a'kapūn tī nā cāmāpa'ksiyān.

²Pō'ktu quilhtamacuj ca'orarlī'ni'tit Dios ē skalalh catahui'latit a'cxni' tlahua'pā'na'ntit oración ē namaxqui'yā'tit tapāxcatca'tzīn. ³Nā nasqui'ni'yā'tit Dios nacāxtlahua chī na'icmāsu'yuyāuj ixtachihuīn ē na'icmāsu'yuyāuj tū jāna'j ixca'tzīcan tū ixla' Cristo. Ū'tza' ixpālacata iclītachi'nī't quit.

⁴Casqui'ni'tit Dios tzej na'icmāsu'yu tū ixla' Cristo chī ixlacasqui'nca.

⁵Tzej calatā'kchokotit na ixlacatinca'n tī jā ta'a'ka'i' ē tzej calacapāstactit tū natlahua'yā'tit na ixlacatinca'n lihuan a'nan quilhtamacuj. ⁶Matzat mojōcan nac lihua' namācanī ē tze nahuan. Nā chuntza' cuenta catlahua'tit mintachihuīnca'n ē chuntza' nakelhtini'nā'tit chī ixlacasqui'nca.

Ā'xmān saludos

⁷Tíquico nacāmāca'tzīniyān chī iclilahuī'lh ē tū ictlahuamā'lh. Xla' quintā'tinca'n ē pāxqui'can. Lilacatejtin quimaktāya ē ixpālacata Māpa'ksīni' quintā'scuja. ⁸Ū'tza' iccālīmācā'ni'yān naca'tziyā'tit chī iclahui'lāna'uj ē jā caticālī'a'ktuyuntit. ⁹Onésimo natā'a'n. Xla' quintā'tinca'n tī lilacatejtin latā'kchoko ē tī pāxqui'can. Xla' xala' a'ntza'. Xlaca'n nacātahuanikō'yān tū a'kspulanī't huā'tzā'.

¹⁰Quintā'tachi'n Aristarco ē Marcos tī ixtā'puxni'mit Bernabé cātamacā'ni'yāchā'n

saludos. Ka'lhī'yā'tittza' limāpa'ksīn ixpālacata Marcos. Palh xla' nacālaka'nāchā'n, camakamaktini'chipitit. ¹¹Jesús tī ka'lhī xtum ixtacuhuīni' Justo cāmācā'ni'yāchā'n saludos. Xmān ixkelhatu'tunca'n israelitas tī quintatā'scujmā'nalh natamāsu'yu chī Dios cāmāpa'ksikō'. Xlaca'n quintamāhui'xcānimā'nalh. ¹²Epafras cāmācā'ni'yāchā'n saludos. Xla' xala' a'ntza' ē ixtasācua' Jesucristo. Cālacapāstacān ē squi'ni' Dios tzej natlā'huanā'tit na ixtej Dios ē namākentaxtūkō'yā'tit ixtalacasqui'nīn Dios.

¹³Iccāhuaniyān xla' scuji mimpālacataca'n ē ixpālacataca'n xalanī'n nac Laodicea ē nac Hierápolis. ¹⁴Doctor Lucas tī pāxqui'can ē Demas cātamacā'ni'yāchā'n saludos.

¹⁵Cacālī'pini'tit saludos quintā'timīnca'n nac Laodicea ē Ninfas ē tā'timīn tī ta'a'ka'i' ē tatakēstoka na ixchic. ¹⁶A'cxni' likelhtahua'kakō'ni'ta'ntittza' huā'mā' carta na milacpu'na'li'tātca'n, camacapintit nac templo nac Laodicea ē nalikelhtahua'kacan a'ntza'. Nā hui'xina'n nalikelhtahua'kayā'tit carta tū naminācha' nac Laodicea. ¹⁷Nahuaniyā'tit Arquivo huā'mā': “Cuenta catlahua' ē tzej camākentaxtu' tascujūt tū mila' chī ixtalacasqui'nīn Māpa'ksīni'.”

¹⁸Quit, Pablo, ictzo'kmā'lh quilimān huā'mā' saludo. Caquilālacapāstacui quit ictachi'nī't. Dios cacāsicua'lanātlahuan. Amén.